

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 2
Enero 21, 2010
www.philippinerevolution.net

Editorial

Sigaw ng masang magsasaka: Lupa at katarungan!

Mula sa iba't ibang sulok ng bansa, binabagtas ngayon ng mga magsasaka ang mga lansangan tungo sa punong lunsod upang padagundugin ang kanilang sigaw para sa lupa at katarungan. Kasabay ng paggunita sa ika-23 taon ng Masaker sa Mendiola sa Enero 22, ipinamamalas ng mga magsasaka ang kanilang determinasyon na labanan ang anti-magsasakang estado at ibayong isulong ang pakikibaka para wakasan ang mapang-api at mapagsamantalang naghaharing sistema.

Animo'y nag-aalburutong bulkan ang naipong galit sa dibdib ng milyon-milyong magsasakang mahigit dantaon nang dinadagangan ng isang lubhang atrasado, mapagsamantala at mapang-aping sistema. Nitong nagdaang siyam na taon sa ilalim ng rehimeng US-Arroyo, lalo silang nasadlak sa kaapihan, kahirapan at kagutuman. Pinag-ibayo ang pangangamkam ng lupa ng malalaking luma at bagong panginoong maylupa, mga makadayuhang agribisnes, ispekulador sa *real estate*, kumpanya sa pagmimina at iba pa. Pinaghahari ang pasismo at terorismo ng estado sa kanayunan.

Matapos ang mahigit 20 taon, ganap nang nahubaran ang huwad na Comprehensive Agrarian Reform Program (CARP). Hindi lamang ito bigo na buwagin ang malalawak na lupain ng malalaking panginoong maylupa, binigyang-daan pa nito ang malawakang pangangamkam ng lupa at konsentrasyon nito sa kamay ng mga bagong panginoong maylupa at malalaking agrokorporasyon.

Kung kaya walang saysay ang paulit-ulit lamang na pagpapalawig ng CARP. Sa ilalim ng rehimeng Arroyo, ang CARP at mga programang umano'y pansuporta sa masang magsasaka ay nagsisilbi lamang na palabigasan ni Arroyo at mga kasabwat niya sa burukratikong korapsyon. Mula sa Fertilizer Fund Scam, Agriculture & Fisheries Modernization Fund Scam, hanggang sa Swine Scam, bilyun-bilyong piso ang ibinubulsa nina Arroyo at kanyang mga upisyal gamit ang pondong laan sa mga serbisyong agrikultural.

Alinsunod sa imperyalistang patakarang globalisasyon ng "malayang pamilihan," inengganyo ng CARP ang pagpapalit-tanim at pagpapalit-gamit ng



**Mga tampok
sa isyung ito...**

**Mga pribadong hukbo,
di totoong babaklasin
ni GMA** PAHINA 4

**Pagpupugay kina
Kimay at Nai** PAHINA 7

**Armadong rebolusyon
sa India** PAHINA 8

mga lupang ipinailalim umano sa reporma sa lupa. Sinagpang ito ng mga dambuhalang korporasyong tulad ng Dole, Stanfilco, TADECO, Philippine Packing Corporation, Del Monte, Marsman Drysdale at Guthrie. Pinalawak pang lalo ang produksyon ng saging, pinya, *palm*, goma at iba pang produktong pang-eksport. Pinalaganap ang mga *hybrid* o mestisong binhi na tuluy-tuloy na nangangailangan ng maraming sangkap na produkto ng mga imperyalista.

Tuluy-tuloy na lumiliit ang nabubungkal na lupa at produksyon ng pagkain para sa lokal na konsumo. Naghihingalo na rin ang produksyon ng mga katutubong pananim. Sumisirit ang presyo ng bigas, mais, asukal, karne at iba pa. Bunga ito ng agresibong pagpapalawak ng produksyong pang-eksport, kasabay ng walang awat na pagtatambak ng sobrang produktong agrikultural mula sa malalaking kapitalistang bansa.

Noong dekada 1990, isinakatu-paran ang kumbersyon ng malalawak na lupaing agrikultural tungong mga *export processing zone* at iba pang proyektong komersyal, panturismo at para sa *real estate*.

Tuluy-tuloy ang pagpasok ng malalaking dayuhan at komprador upang dambungin ang mga kabundukan at kagubatan, anupaman ang idulot nitong pagkawasak sa kapaligiran at pagyurak sa karapatan ng mga mamamayang minorya sa kanilang lupaing ninuno. Kapital ng \$1 bilyon pamumuhunan, balak ng rehimeng Arroyo na ilaan sa mga dayuhang kapitalista ang hanggang isang milyong ektarya ng mga lupaing agrikultural sa Mindoro, Mountain Province at iba't ibang probinsya sa Mindanao.

Lalong lumulubha ang kahirapan ng masang magsasaka. Ibayo pang lumaki ang bilang at porsyento ng mga magsasakang wala o lubhang kulang sa lupa. Tinatayang mahigit 70% na ng mga magsasaka ang walang sariling nabubungkal na lupa.

Matinding pagsasamantala ang dinaranas ng mga magsasakang nananatiling kasamang umuupa ng lupang mabubungkal. Laganap pa rin ang sistema kung saan sangkapat hanggang sangkatlong bahagi ng kanilang ani ang ibinabayad sa may-ari ng lupa na walang ambag na paggawa o puhunan.

Mas masaklap pa rito ang kala-

gayan ng mga manggagawang bukid na pana-panahon lamang may trabaho. Tuwing tagtanim, kumikita lamang sila ng ₱23 hanggang ₱40 kada araw—wala pang 10% ng dapat na minimum na sahod ng mga manggagawa. Malaki pang bahagi ng kita nila ang kailangang ibayad bilang interes sa mga pinagkakautangang panginoong maylupa at komersyante-usurero.


Bunga ng pagsasamantalang pyudal, komprador, burukratiko kapitalista at imperyalista sa kanayunan, lalong nababaon ang mga magsasaka sa matinding kahirapan at kagutuman sa kabila ng walang tigil nilang pagbabanat ng buto at pagpapatulo ng pawis.

Anumang paggigiit ng mga magsasaka ng kanilang mga hinang ay sinasagot ng dahas ng mga despotikong naghahari, gamit ang mga pasistang instrumento ng papet at reaksyunaryong guberno at estado, bukod sa kanilang pribadong *goons*. Ginagamit din ng reaksyunaryong estado ang militar upang bigyang-proteksyon ang malalaking dayuhan, komprador at burukrata kapitalistang kumpanyang mandarambong ng mga gubat at kabundukan.

Sa panahon ng rehimeng Arroyo, umaabot na sa 561 magsasaka ang biktima ng mga ekstrahudisyal na pamamaslang. Malaking bilang pa ang di na naiulat. Libu-libo pang magbubukid ang biktima ng pagdukot, ilegal na pang-aaresto, pagsasampa ng mga gawa-gawang kaso, tortyur, pananakot at iba pang paglabag sa karapatang-tao. Milyun-milyong magsasaka ang biktima ng matitinding operasyong militar; pambobomba, panununog at pagsira ng kanilang mga tahanan at taniman; sapilitang ebakwasyon; mga *food blockade*; at iba pang anyo ng terorismo.

Matitiyak lamang ang kalutasan

“Lupa at..” sundan sa pahina 3

 <p>Taon XLI Blg. 2 Enero 21, 2010</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p>www.philippinerevolution.net</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa:</p> <p>angbayan@yahoo.com</p>	
<h2>Nilalaman</h2>	
Editorial	
Lupa at katarungan	1
Lakbayan ng mga magsasaka	3
Pangigigipit sa lider-masa	3
Pribadong hukbo, di babaklasin	4
Kasinungalingan ng AFP sa Negros	5
Saywar sa SMR	6
Matatagumpay na opensiba	
Mga taktikal na opensiba	7
Pagpupugay kay Kimay at Nai	8
Sa ibayong dagat	
Rebolusyon sa India	8
Lindol sa Haiti	10
Mga sibilyan sa Afghanistan	12
Balita	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Lakbayan ng mga magbubukid

Inilunsad noong Enero 12 ang “Lakbayan para sa Lupa at Katarungan,” isang karaban kung saan ang mga delegasyon ng mga magsasaka, manggagawang bukid at mangingisda mula sa mga rehiyon ng Southern, Central at Northeastern Mindanao ay nagtipon, nagmartsa at naglakbay patungong Luzon. Nakipagtagpo sila sa mga kauring anakpawis mula sa Panay, Negros, Cebu, Bohol at Leyte sa Samar at mula roon ay tumawid sa Bicol at dumaan sa Southern Tagalog patungong Maynila. Magtitipon sila sa tapat ng upisina ng Department of Agrarian Reform sa Quezon City kung saan sasalubungin sila ng mga delegasyong nagmula sa hilaga—Cagayan Valley, Ilocos, Cordillera at Central Luzon. Mula roon ay tutulak sila patungong Tulay ng Mendiola sa Enero 22 para gunitain ang ika-23 anibersaryo ng Masaker sa Mendiola.

Ang 10-araw na lakbayang ito ang kaula-unahang martsa-protesta na may pambansang saklaw sa kasaysayan ng hayag na kilusang magbubukid sa Pilipinas. Tunay nga’t malawak at malalim ang epekto ng kilos-protestang ito kung kaya kaliwa’t kanan na ang panggigipit ng mga bayarang ahente ng reaksyunaryong estado rito.

Hinarang ng mga sundalo ng AFP ang mga magbubukid mula sa Camarines Norte patungong Sorsogon City para salubungin ang kapwa nilang mga magsasaka mula sa Samar. Isa namang ahenteng paniktik ng AFP ang nanguha ng litrato ng mga myembro ng delegasyon mula sa Visayas at Mindanao. Tinatadtad din ng militar, pulisya at CAFGU ng mga tsekpoynt ang rutang dinaraan ng karaban para maantala ang dating ng mga nagpoprotesta sa Mendiola. **AB**

“Lupa at..” mula pahina 2

ng dantaon nang suliranin sa lupa, at kaakibat na pyudal at malapyudal na pagsasamantala at pagmamalupit sa mga magsasaka sa pamamagitan ng pagsusulong ng rebolusyong agraryo. Kasabay nito, isinusulong ng programa ng demokratikong rebolusyong bayan ang paglaban sa imperyalismo, pyudalismo, burukrata kapi-

Panggigipit sa mga lider-masa at mamamahayag

Matinding hasment sa mga progresibong lider-masa at kagawad ng midya ang tampok sa mga paglabag sa karpatang-tao na nakalap ng *Ang Bayan* nitong Enero 4 hanggang 13.

Enero 13. Pinagsusuntok ni Iligan City Councilor Chonilo Ruiz ang brodkaster na si Alberto Loyola habang ibinubunyag niya sa kanyang programa sa radyo ang anomalya hinggil sa badyet ng konseho. Binatikos ng National Union of Journalists of the Philippines ang hasment na ginawa kay Loyola.

Enero 7. Tinangkang rekrutin ng dalawang sundalong nakasuot sibilyan si Cesar Lopez Dionido, pangkalahatang kalihim ng Bagong Alyansang Makabayan (BAYAN) sa National Capital Region. Nilapitan si Dionido ng isa sa mga sundalo habang sakay ng motorsiklo ang isa pang militar. Sinabihan siya ng sundalo na alam niya ang mga aktibidad ni Dionido at alam din niyang nahihirapan siyang bayaran ang upa sa kanilang bahay. Inalok siya ng trabaho, pilit siyang binigyan ng *cellphone* at sinabihang tawagan ang nag-iisang numero rito. Nang hindi tanggapin ni Dionido ang *cellphone*, sinabihan siyang huwag na niyang hintaying puntahan pa siya ng mga unipormadong sundalo sa kanyang tirahan.

Ayon kay Dionido, noong Nobyembre ay nakatanggap din siya ng mensaheng *text* na nagsasabing “Kilala kita at kung ano ang mga ginagawa mo. Itigil mo na ang mga aktibidad mo.” Aniya, bahagi lamang ito ng panggigipit ng rehimeng Arroyo sa mga aktibista at mamamayang Pilipino.

Enero 4. Pinuntahan ng apat na sundalo sa bahay si Allan Monterde, bise presidente ng Samahan ng Mamamayan sa Basco (SMB), na kaanib ng KADAMAY. Ang mga sundalo ay nagmula sa First Community Development Company ng AFP na nakadeploy na sa Basco sa Tondo, Maynila mula Enero 1.

Isa sa mga sundalo na nagpakilalang tinyente ang humingi ng listahan ng mga lider at myembro ng SMB at nagtanong kung saan matatagpuan ang iba pang mga upisyal nito. Kinabukasan ay binalikan si Monterde ng mga sundalo at pinagtatanong muli hinggil dito. **AB**

talismo at pasistang karahasan sa kabuuan ng bansa.

Ang pagpupursige ng armadong pakikibaka bilang pangunahing anyo ng paglaban sa umiiral na bulok na paghahari sa kanayunan at buong bansa ay nagbibigay-inspirasyon sa kasabay na pagsusulong ng mga hayag at ligal na pagkilos para sa tunay na reporma sa lupa. **AB**

Mga pribadong hukbo, hindi totoong babaklasin ni Arroyo

Hungkag ang deklarasyon ng rehimeng US-Arroyo na babaklasin ang mga pribadong hukbo sa bansa, ayon sa pahayag ni Kasamang Jorge "Ka Oris" Madlos, tagapagsalita ng National Democratic Front-Mindanao. Ayon kay Ka Oris, walang kahihinatnan ang itinatayo ng rehimeng US-Arroyo na "Anti-Private Army Commission."

Ang totoo, layunin ng rehimeng Arroyo na palakasin pa ang mga pribadong hukbo na mapakikinabangan nito at baklasin yaon lamang hawak ng oposisyon. Sa gayo'y makokonsolida pa nito ang kapit sa kapangyarihan at makapangangibabaw sa darating na eleksyon.

Ang pinakamababagsik at sagdsaring mga pribadong hukbo sa Mindanao ay yaong nagtiyak ng pinalo ng pangkating Arroyo noong nakaraang dalawang pambansang eleksyon. Ang pinakamalaki rito ay ang sa angkang Ampatuan, na gayo'y isinasakdal sa kaso ng Maguindanao Massacre noong Nobyembre 23, 2009.

Bukod pa sa angkang Ampatuan, namamayagpag din sa Mindanao ang iba pang maka-Arroyo na mga pulitiko na may kani-kanyang pribadong hukbo (*tingnan ang talahanayan*). Bukod sa mga nakahanay ay marami pang gayong grupong nakakalat sa 24 na probinsya ng Mindanao.


Para magmukhang ligal ang operasyon ng mga pribadong hukbo, nag-oopereyt sila bilang C A F G U , C A A ,

armado na CVO, *security guard*, LGU *task force* o *action team* na pinupondohan ng mga lokal na guberno at mga pondong paniktik na hindi dumadaan sa awditing. Ang mga armas at kagamitan nito ay galing sa arsenal ng militar at pulisya, na ibinibenta o ipinahihiram sa kanila.

Mayroon ding mga pribadong hukbo ang mga iligal na magtotoroso, iligal na nagmimina, sindikato sa droga at iligal na sugal, *kidnap-for-ransom group* at bayarang mamatay-tao. Ang mga ito'y may direkta o di direktang ugnay sa militar, pulis at sa mga pulitiko. Nagagamit din sila sa pandaraya sa eleksyon, terorismo, pampulitikang pamamaslang at para sa mga kontra-rebolusyonaryong kampanya ng militar.

Inoorganisa at inaarmasan din ng AFP, mga pulitiko at mga negosyante ang mga Lumad kung saan ang datu at iba pang hawad na lider-Lumad ay pumapapel bilang lokal na *warlord*.

Nagmamantini sila ng mga armadong tauhan para tiyakin ang tuluy-tuloy na operasyon ng iba't



Mga warlord ng Mindanao

Mag-amang Abdul at Khalid
Dimaporo ng Lanao del Sur

Magkapatid na Jalosjos
ng Zamboanga del Norte

Reynaldo Parojinog
ng Misamis Occidental

Roberto Luna
ng Lingig, Surigao del Sur

Joel Brillantes ng Compostela Valley

Claude Bautista ng Davao del Sur

Magkapatid na Piñol
ng North Cotabato

Mga Ecleo
ng Dinagat, Surigao del Norte

Druglord na si Congressman
Guillermo Romarate
ng Surigao del Norte

Mayor Peter "Boy" Ruaya
ng Dapa, Surigao del Norte

Mayor Cezar Diaz
ng Taganaan, Surigao del Norte

Congressman Democrito "Boy Daku"
Plaza ng Agusan del Norte

Congressman Edelmiro Amante
ng Agusan del Norte

Mayor Emiliano Rodriguez
ng Rosario, Agusan del Sur

Mayor Leonida Manpatilan
ng Esperanza, Agusan del Sur

Gov. Abdusukur Tan ng Jolo

Congressman Antonio Cerilles
ng Zamboanga del Sur

Gov. Jum Akbar ng Basilan

ibang iligal na aktibidad. Ginagamit din ang mga ito sa kampa-nyang *counter-insurgency* sa ilalim ng Oplan Bantay Laya. Ang pumapayong sa kanila ay ang Task Force Gantangan at ang armadong grupo nitong Bagani Force.



Ilan sa mga gru-

pong Lumad na ito ang mga armadong tauhan nina Datu Paquito, Datu Kalpet, Datu Napungahan, Datu Behing, at Wild Dog ni Mayor Leonida Manpatilan, lahat sa Agusan del Sur; Bungkatol Liberation Front (BULIF) ng Agusan del Norte at Misamis Oriental; mga bandidong Dela Mance at Pangayaw Force sa Bukidnon; at Alamara sa Davao del Norte at Bukidnon.

Mas malaki, mas makapangyarihan at mas malakas ang maka-administrasyong mga pribadong hukbo kung ihahambing sa relatibong kakaunti at mas maliliit na pribadong mga hukbo ng oposisyon.

Sa Pilipinas, ang malalaking panginoong maylupa, komprador burgesya at burukrata kapitalista ang mga bagong *warlord* na gumagamit sa AFP, PNP, CAFGU at iba pang paramilitar na grupo bilang mga pribadong hukbo para maigiit ang kanilang monopolyo sa ekonomya at pulitika. Ang lahat ng ito'y mga pribadong hukbo ng naghaharing uri na inaarman at pinopondohan ng imperialismong US.

Kaya si Gloria Arroyo bilang *commander-in-chief* ng AFP ang siyang pinakamalaking *warlord* sa bansa ngayon. Patuloy na nanaalasa sa bansa ang kanyang makinarya sa terorismo sa pamamagitan ng mga ekstrahudisyal na pamamaslang sa kanyang mga kritiko at myembro ng oposisyon. Kaya hindi kailanman maaasahan na tototohanin ng rehimeng Arroyo ang pangakong babaklasin ang mga pribadong hukbo. **AB**

Mga tagumpay ng AFP sa Negros, puro kasinungalingan

Pawang mga kasinungalingan at panlilinlang ang sinasabing mga tagumpay ng Oplan Bantay Laya (OBL) 2 sa Negros. Ito ang sagot ni Ka Frank Fernandez, tagapagsalita ng National Democratic Front-Negros, sa ipinagmamayabang ng militar na mga tagumpay nito sa isla. Nabigo ang Armed Forces of the Philippines (AFP) at Philippine National Police (PNP) na pahinain at gawing "problemang pampulis na lamang" ang Bagong Hukbong Bayan (BHB) pagsapit ng 2010.

Patunay ng kabiguang ito ang nagpapatuloy na pag-atras sa tanging ng Central Command (Cencom) ng AFP mula 2008 tungong 2010, ani Ka Frank. Bunsod nito, natatali ang mga pwersa ng AFP sa Negros imbes na lumipat na ang mga ito sa ibang isla ng Visayas.


Ang linyang saywar na ito ng militar at pulisya ay naglalayong lansihin ang mga mamamayan ng Negros para mawalan na sila ng pag-asa sa demokratikong rebolusyon ng bayan, ani Ka Frank. Pangalawa, nagsisilbing batayan ito ng hinahabol na promosyon nina Lt. Col. Nemesio Franco Gacal ng 11th IB at Lt. Col. Cesar Yano ng 303rd Brigade at sa pagpapataas ng moral ng mga sundalo.

Para tabunan ang kanilang kabiguan, idinadahilan palagi ng AFP at PNP na kulang sila ng tropa bagamat may sobrang konsentrasyon ng mga armadong tropa sa isla. Sa katunayan, umaabot ng humigit-kumulang 9,000 ang mga pwersa ng AFP, PNP, CAFGU, CVO, bandidong

Revolutionary Proletarian Army (RPA) at mga *goons* ng mga *warlord*-pulitiko sa Negros.

Sa kabila ng mga panlilinlang, panggigipit at matinding pandarahas ng mga pasistang galamay ng rehimeng US-Arroyo laban sa mga rebolusyonaryong pwersa at mamamayan ng Negros, nagkamit ang rebolusyonaryong kilusan sa isla ng mga tagumpay. Ayon kay Ka Frank, patuloy na nag-iipon ng pwersa ang Partido, mga platun ng BHB at yunit ng milisyang bayan at baseng masa sa kanayunan at sumusulong ang pakikibakang masa sa mga sentrong urban. Habang patuloy ang rebolusyonaryong kilusan sa gawaing rekoberi ay nakapagpalawak pa ang mga larangang gerilya at pursigidong nagpapatupad ng minimum na programa ng rebolusyong agraryo na napakinabangan na ng ilang libong mamamayan.

Isa sa pinakahuling mga tagumpay ng BHB sa larangang militar ang ambus sa Sityo Indangawan, Barangay Manlocahoc, Sipalay City, Negros Occidental noong Disyembre 9. Apat na sundalo ng 61st IB ang napatay at may di tiyak na bilang ng mga tropa ng AFP ang nasugatan. Para hindi makita ng mamamayan ang kanilang mga kaswalti, itinago ng militar



ang mga bangkay sa ilalim ng upuan sa likod ng isang trak na siksbay.

Matagumpay ding naidaos ang selebrasyon ng ika-41 anibersaryo ng Partido sa isang kampo ng Southwest Guerrilla Front. Dinaluhan ito ng mahigit 200 bisita mula sa mga syudad at interyor na mga barangay sa kabila ng nagpapatuloy na operasyon ng kaaway.

Sa kabilang banda, ang sobrang konsentrasyon ng pwersa ng kaaway sa Negros, ani Ka Frank, ay nagbigay naman ng relatibong kaluwagan sa mga isla ng Panay, Central Visayas at Eastern Visayas para sa mas mabilis nitong pag-abante. Kaugnay nito, magsisikap ang armadong rebolusyonaryong kilusan sa Negros na makapag-ambag sa pambansang panawagan ng Partido na maghanda para sa pag-igpaw tungo sa antas ng estratehikong pagkapatas sa susunod na limang taon. AB

Saywar ng militar

Mariing pinabulaanan ng Merardo Arce Command (MAC) ng BHB-Southern Mindanao ang bulaang pahayag ng 10th Infantry Division na 83 sibilyan ang pinatay ng BHB sa rehiyon noong 2009.

Ayon kay Rigoberto F. Sanchez, tagapagsalita ng MAC, ang sinasabi ng AFP na inosente umanong mga sibilyan ay mga impormer o operatibang paniktik na bahagi ng armadong makinayang militar ng reaksyunaryong estado. Samakatwid, sila'y mga lehitimong target ng BHB.

Dagdag ni Sanchez, pinalalabas ng militar ang kasinungalingang ito para mailihis ang atensyon ng mamamayan sa matitinding dagok na dinanas nila noong 2009 mula sa sunud-sunod na mga anihilatibo at atritibong taktikal na opensiba ng BHB. Pinabulaanan din ng BHB ang pahayag ng AFP na 15 lamang na mga sundalo nito ang napatay sa mga

labanan sa pagitan ng mga Pulang mandirigma at ng AFP. Anito, dahil lubos na bigo ang Oplan Bantay Laya ng rehimeng US-Arroyo, tumitindi ang mga pagsisikap ng militar na pagtakpan ang katotohanan.

Ayon kay Sanchez, mahigpit na tumatalima sa mga patakaran ng digma ang mga Pulang mandirigma kaya nababawasan ang pagkakasangkot ng mga sibilyan sa mga labanan. Samantala, sa panig ng militar, ipinagkakaila nito ang pananagutan ng AFP sa libu-libong mga ekstrahudisyal na pagpatay na kagagawan ng mga tropa nito at napatunayan mismo ng United Nations at ng Commission on Human Rights. AB

Mga aksyong militar ng BHB sa Bicol, SMR at EV

Dalawampung armas na iba't iba ang kalibre ang nakumpiska sa iba't ibang aksyong militar ng Bagong Hukbong Bayan (BHB) sa Bicol, Eastern Visayas at Southern Mindanao nitong Enero. Limang sundalo rin ang napatay at 19 na tropa ng kaaway ang nasugatan sa mga aksyong militar na ito.

Sa Masbate, dalawang Bushmaster rifle, isang M16 at isang shotgun ang nasamsam ng isang yunit ng Jose Rapsing Command ng BHB mula sa isang kandidato para bise alkalde sa Barangay Tanguilid, Claveria nitong Enero 16, ayon kay Ka Greg Bañares, tagapagsalita ng National Democratic Front-Bicol.

Samantala, di bababa sa 14 na armas ang nakumpiska ng mga Pulang mandirigma ng BHB mula sa mga abusadong security guard ng isang plantasyon ng saging sa Ba-

rangay Tagnanan, Mabini, Compostela Valley nitong Enero 14. Kinabibilangan ito ng tatlong AK47, dalawang M16, apat na kal .45 na pistola at pitong shotgun. Nakasamsam din ang mga gerilya ng apat na radyong pangkomunikasyon.

Sa Masbate City, dalawang sundalo ng 49th IB ang napatay at walong iba pa ang nasugatan nang pasabugan sila ng mga Pulang mandirigma ng command-detoned explosives (CDEX) habang sakay ng trak na Isuzu Elf sa Barangay

Lalaguna, Mobo noong umaga ng Enero 15.

Ilang oras makaraan nito, dalawang tropa ng 49th IB ang napatay at siyam ang nasugatan nang tambangan sila ng BHB sa kahabaan ng Maharlika Highway sa Barangay Palogtok, Irosin, Sorsogon. Pinasabugan ng CDX ang sinasakyang trak ng kaaway na nagresulta sa maraming kaswalti sa hanay mga sundalo. Gaya ng dati, itinago ito ng militar sa midya.

Isang araw bago ang mga labanang ito, inambus ng mga Pulang mandirigma ang dalawang sundalo ng 2nd IB sa Barangay Taplacon, Camalig, Albay. Napatay ang isa at ang isa pa ay malubhang nasugatan.

Sa ibang dako ng bansa, isang tropa ng 14th IB ang nasugatan nang magkalabanan ang mga militar at BHB noong Enero 13 sa Barangay Oras, Eastern Samar. AB

Pagpupugay kina Kimay at Nai

Nagpugay ang mga rebolusyonaryong pwersa kina Kemberly Jul Luna (Kimay) at Ian Maderazo (Nai) bilang mga iskolar ng bayan at martir ng kabataan at rebolusyon. Sa mura nilang edad, masigasig silang kumilos at nag-organisa sa hanay ng kabataan at masang anakpawis.

Sa kanilang mga burol, bumuhos ang suporta, pagdadalamhati at pagpaparangal. Sila'y kapwa mga huwaran ng mga kabataang hindi alintana ang mga hirap at sakripisyo sa paglilingkod sa mamamayan. Ang kanilang kamatayan ang magsisilbing panawagan sa mga kabataan at estudyante na ialay ang kanilang lakas, talino at mga kakayahang para sa mamamayan at sa kanilang armadong rebolusyon.

Kimay

Si Kimay, 21 taong gulang, ay isinilang noong Hulyo 23, 1988 sa Surigao del Sur. Ang kanyang pamilya ay isa sa mayayamang angkan sa prubinsya. Nagtapos siya sa hayskul na isang *valedictorian*.

Nagsimula ang kanyang pagkamulat nang sumapi siya noong 2008 sa League of Filipino Students at aktibong lumahok sa pag-oorganisa at pagpapakilos hindi lamang sa paralaran kundi sa hanay ng manggagawa at magsasaka. Naging tagapangulo siya ng Student Alliance for Nationalism and Democracy sa Mindanao State University, Iligan Institute of Technology (STAND-MSU-IIT) at isa sa mga nanguna sa mga pagkilos kaugnay ng mga isyung pampamantasan, laban sa presensya at panghihimasok ng mga tropang

Amerikano sa Mindanao at pagsuporta sa mga bakwit sa mga prubinsya ng Lanao bunsod ng gera.

Kalagitnaan ng taong 2008 ay sumapi si Kimay sa KASAMA-Bukidnon at tumulong sa pag-oorganisa ng mga magsasaka. Doon naging malawak ang kanyang pag-unawa sa pagsasamantala at pang-aaping pyudal sa mga magsasaka sa kanayunan. Nagbigay siya ng serbisyong panliterasiya sa mga magsasaka. Tinagurian din siyang "Ma'am Nurse" dahil sa pagtulong niya sa mga may karamdaman at pagbibigay ng serbisyong medikal.

Taong 2009 nang lumahok si Kimay sa armadong rebolusyon at sumapi sa Bagong Hukbong Bayan (BHB). Mas pinanday ni Kimay ang kanyang kakayahan bilang kabataan na kumilos sa armadong pakikibaka at magbuhos ng panahon dito. Disyembre 15 ng nakaraang taon ay nasawi si Kimay sa labanan sa pagitan ng kanilang yunit at ng 8th IB sa Sityo Bulacao, Barangay Concepcion, Valencia City, Bukidnon.

Nai

Si Nai, 26 taong gulang, ay ipinanganak noong Disyembre 7, 1983 sa Vinzons, Camarines Norte. Nagtapos siyang *valedictorian* sa

Vinzons Pilot School samantalang gradweyt naman siya sa kursong BS Agricultural Chemistry sa University of the Philippines-Los Baños (UPLB).


Sa kolehiyo, naging myembro at lider siya ng Pi Sigma Fraternity noong 2001-2006. Naging kinatawan din siya ng kanilang konseho sa kolehiyo no-

ong 2002 at naging tagapangulo ng pinakamalaking partido at alyansa sa UPLB. Naging mahusay siyang lider-estudyante na namuno sa iba't ibang kampanya sa kanilang pamantasan. Nanguna rin siya sa *relief operations* para sa mga nasalanta ng malawakang pagguho ng lupa at pagbaha sa Real, Quezon at mga pagkilos laban sa rehimeng Arroyo.

Ayon sa kanyang pamilya at mga kasama, si Nai ay mahusay sa kompyuter, magaling magsalita sa publiko, simple, walang bisyo, mataas ang inisyatiba sa gawain at tinaguriang "*crush* ng bayan" sa pamantasan. Paglabas niya sa pamantasan ay kaagad niyang niyakap ang armadong pakikibaka sa kanayunan. Doo'y mas nakilala siya ng mga magsasaka bilang "Ka Danoy." Nasawi siya noong Enero 9 sa isang labanan sa pagitan ng BHB at mga elemento ng 76th IB at Quezon PNP Provincial Mobile Group sa Sityo Palo, Barangay Olongtao, Macalelon, Quezon.

Sa isang pahayag, hinikayat ng Partido Komunista ng Pilipinas ang mga estudyante at kabataang Pilipino na sundin ang halimbawa nina Kimay, Nai at ilampung libong iba pa na tumalikod sa mga makasariling ambisyon at yumakap sa komun na pangarap ng mamamayang Pilipino para sa pambansa at panlipunang paglaya.

AB





Pag-arangkada ng rebolusyonaryong armadong kilusan sa India

Hango sa ulat ng Political Bureau (PB) ng Communist Party of India-Maoist na inilabas noong Oktubre 2009

Anim na taon na ang nakalilipas mula nang magsanib ang Maoist Communist Center of India at Communist Party of India-Marxist-Leninist (People's War) upang itatag ang Communist Party of India-Maoist (CPI-M). Mula noon, lumawak at tumatag ang armadong pakikibaka sa India at lumaganap ang kilusang masa na direktang humamon sa paghahari ng reaksyunaryong rehimen sa India. Matagumpay na nabigo ng kilusan ang mga pagtatangka ng mga reaksyunaryong pwersa na gapiin ito. Samantala, tulu-tuloy nitong nako-konsolida ang mga tagumpay ng mga rebolusyonaryong pwersa at mamamayan.

Sa pangkalahatan, naabot ng CPI-M ang mga inilatag nitong tungkulin tulad ng pagpapalawak ng People's Liberation Guerrilla Army (PLGA) at paglalatatag ng mga base para sa pagsusulong ng armadong kilusan. Naitatag at napalawak din nito ang mga organo ng kapangyarihang pampulitika at matagumpay na nakapaglunsad ng rebolusyong agraryo para sa kaunlaran ng mahihirap na magsasaka at pambansang minorya.

Tinukoy ng CPI-M ang sumusunod na mga tagumpay:

Napalawak at napalakas ang armadong kapasidad ng PLGA. Taun-taon, signipikanteng lumaki ang bilang ng mga nailunsad na taktikal na opensiba at iba pang armadong aksyon ng PLGA. Mula Setyembre 2008 hanggang Setyembre 2009 lamang, mahigit 300 tropa ng reaksyunaryong hukbo at pulisya ang napatay, habang mas marami pa ang nasugatan.

Tampok sa mga ito ang koordinadong reyd sa tatlong istasyon ng

pulis, isang armori, isang kolehiyo ng pulisya at ilan pang detatsment ng pulis sa bayan ng Nayagarh, Orissa noong Pebrero 15, 2008. Nakasamsam ang mga gerilya ng PLGA ng mahigit 1,100 armas at mahigit 100,000 bala sa mga reyd na ito. Naipamalas ng PLGA ang presiso at mahusay na pagpapalano nang isailalim ng mga mandirigma nito ang buong bayan ng Nayagarh sa kaniyang kontrol sa loob ng dalawa't kalahating oras. Ayon sa mga ulat, malaking bilang ng mahigit 600 armadong mandirigma na nagsagawa ng koordinadong reyd ay mula sa milisyang bayan—tinatawag na "baseng pwersa" ng PLGA. Ang PLGA ay binubuo ng "pangunahing pwersa" (mga pultaym na platung panalakay at pamproteksyon), "segundayong pwersa" (mga iskward gerilya) at "baseng pwersa" na nagsisilbing pinakamalaking bahagi ng PLGA.

Ang reyd sa Nayagarh ay panganim na sa mga koordinadong aksyong militar na nailunsad ng PLGA

mula nang maitatag ang CPI-M. Ang pinakauna ay inilunsad sa bayan ng Koraput, sa distrito rin ng Orissa noong Pebrero 6, 2004. Ang pinakahuli ay sa Rigga, Bihar's Sitamarhi noong Marso 31, 2007.

Isa pang tagumpay ng PLGA ang ambus noong Hunyo 24, 2008 sa dalawang yunit ng Greyhound, tinaguriang "pinakamahusay na komando" ng reaksyunaryong hukbo. (Ang isang yunit ay binubuo ng 35 "Greyhound.") Inilatag ng PLGA ang bitag sa pamamagitan ng pagkakalat ng impormasyong mayroong nangyayaring "pulong ng CPI-M" sa Orissa. Dahil dito, ipinadala ng sentrong guberno ang Greyhound para ireimpors ang lokal na pwersa ng pulis sa Orissa. Sakay ng isang barko, walang kamuwang-muwang na pumasok sa bitag ang mga Greyhound. Lumubog ang barko nang paputukan ito ng mga pwersa ng PLGA at 38 Greyhound ang napatay habang ang natitira ay malubhang nasugatan.

Isa pang mapangahas na aksyon ang ginawang "area ambush" ng laking-kumpanyang pwersa ng PLGA sa Maanpur, Rajnandgaon noong Hunyo 12, 2009.

Dalawampu't limang armas ang nasamsam ng mga gerilya at 30 pulis, kabilang ang *superintendent* ng naturang bayan ang napatay sa "area ambush."

Sa ilalim ng operasyong ito, apat na ambus sa tatlong magkaka-hiwalay na lugar ang sunud-sunod





na isinagawa ng PLGA. Ang unang ambus ay laban sa isang detatsment ng pulis bandang alas-6 ng umaga. Ang pangalawa ay ambus sa ipinadalang reimporsment habang bumibyahe ang mga ito, 15-20 kilometro ang layo mula sa unang ambus. Mga pwersang reimporsment din ang naging target sa pangatlo at pang-apat na ambus. Nangyari ang lahat ng ito bago mag-alas-3 ng hapon.

Lumawak at nakonsolida ang baseng masa. Naitatag ang mga *janathana sarkar* (organo ng kapangyariang pampulitika) sa ilandaang baryo at nakonsolida ang mga ito sa antas erya at dibisyon. May naitayong Department of Trade and Industry sa mga naitatag nang *janathana sarkar*. Salamin ito ng inabot nang pag-unlad ng mga komunidad sa ilalim ng Pulang kapangyarihan at kakayahan ng mamamayan sa paggugubyrno. Itinatag ang isang pahayagan, ang *Lokur Adhikar*, para maging aktibong daluyan ng pagbabahaginan ng mga karanasan sa pagitan ng mga *janathana sarkar*.

Naisulong at napalakas ang mga kilusang masa. Nitong nakaraang limang taon, naging malakas na pwersa ang kilusang masang pinamumunuan ng CPI-M laban sa pandarambong ng mga dayuhang kumpanya, kasabwat ang reaksyunaryong gubyrno at mga lokal na naghaharing uri.

Matatagumpay ang paglaban ng mamamayan laban sa malawakang pagpapalayas at pangangamkam ng lupa ng mga dayuhan at malalaking kumpanya. Kabilang dito ang pagkilos laban sa mga operasyon ng pagmimina sa iba't ibang dako

ng bansa na nagdulot na ng malawakang pagpapalayas ng mga magsasaka at pambansang minorya. Gayundin, naging aktibo ang Partido sa paglaban sa mga pakana ng reaksyunaryong gubyrno ng India na naglalayong higit pang ibenta ang mga natural na yaman ng bansa sa mga dayuhang korporasyon sa ngalan ng "pag-unlad" tulad ng paglalatatag ng mga *export processing zones*.

Partikular sa Nandigram, West Bengal, nabigo ang plano ng lokal na naghaharing partido rito na kamkamin ang lupa ng mahihirap na magsasaka para pagtayuan ng mga *export processing zone* ng mga dayuhang korporasyon. Naging saksi ang lahat sa makasaysayang armadong pag-aklas ng mga magsasaka at pambansang minorya na tumarget sa mga pwersa ng militar at pulis ng estado noong 2007. Gamit ang mga tradisyunal na armas, binarikadahan ng ilampung libong magsasaka ang mahigit isandaang mga baryo at hinadlangan ang pagpasok ng mga sundalo at pulis dito sa loob ng halos isang taon.

Ilampung libong magsasaka rin ang nagmartsa mula Nandigram tungong Kolkata, sentro ng West Bengal para igiit ang pag-atras ng mga proyekto ng estado sa kanilang mga komunidad. Ang pakikibaka sa lugar na ito ay nagbigay-daan sa isang bagong porma ng pakikibaka, kung saan libu-libo ang ispontanyong lumahok sa armadong pagkilos. Naging tampok sa mga pagkilos na ito ang paglalantad sa kabulukan at kainutilan ng naghaharing partidong Communist Party of India-Marxist (na hindi tunay na komunista o Marxistang

partido, kundi isang sosyal-pasitang partido). Kasabay ng aktibong pagdepensa sa kanilang mga komunidad, nagsagawa rin ang mamamayan dito ng mga proyekto para mapaunlad ang kanilang kabuhayan, tulad ng paglalatatag ng mga daan at pagtatayo ng mga *dam* para sa irigasyon, mga *health center* at eskwelahan para sa mga batang katutubo at iba pa.

NAHAHARAP ngayon sa mas malalaking hamon ang rebolusyonaryong kilusan sa India. Dahil sa matatag at tuluy-tuloy na paglaban ng mga rebolusyonaryong pwersa sa mga maka-imperyalista at reaksyunaryong rehimen, nagdeklara na ng todo-gera ang naghaharing rehimen ng India para puksain ang CPI-M at PLGA. Sa tinatawag na Operation Green Hunt, sinimulan ng reaksyunaryong estado ang pagpapadala ng mga grupong paramilitar sa mga kilalang base ng PLGA. Noong Nobyembre 2009, nagpadala na ito ng 18 kumpanya ng pwersang paramilitar (Central Paramilitary Forces) sa mga lugar na tinukoy na base ng rebolusyonaryong kilusan. Nakahanda rito ang CPI-M at pinamumunuan nitong hukbong bayan.

Ngunit higit pa rito ang pinaghahandaan ngayon ng CPI-M at rebolusyonaryong kilusang nasa pamumuno nito. Habang papasok ang pinag-isang Partido sa ika-anim na taon ng armadong pakikibaka, inilatag ng Political Bureau ang susing mga tungkulin ng mga rebolusyonaryong pwersa at mamamayan ng India. Kabilang dito ang paglalatatag at pagpapalawak ng mga baseng erya at pagtransporma sa kasalukuyang yugto ng gerilyang pakikidigma tungo sa makilos na pakikidigma, gayundin ang transportasyon ng kanilang gerilyang hukbo tungo sa pagkakaroon na ng katangiang regular.



Haiti, sinalanta ng lindol

Daan-daang libo ang pinangangambahang namatay at hanggang tatlong milyon ang kabuuan ng mga matinding napinsalaan sa malakas na lindol na tumama sa Haiti noong Enero 12. Mahigit sangkatlo ito ng populasyon ng bansa. Halos nabura sa mapa ang kabisera nitong Port-au-Prince, kung saan maraming bahay, upisina, trabahuan, eskwelahan, ospital at kalakhan ng mga imprastruktura ang nawasak.

Larawan ngayon ng sukdulang hinagpis at kahirapan ang Haiti. Salat ang suplay ng pagkain, tubig, gamot at iba pang esensyal na pangangailangan. Nagkalat ang mga bangkay sa mga lansangan at marami pang natabunan ang hindi pa matagpuan. Habang tumatagal ay unti-unting nawawalan na ng pag-asang may mahuhukay pang mga buhay sa gumuhong mga gusali.

Subalit pinakahuli lamang ang lindol sa mga sakunang matagal nang nagdudulot ng malawakang paghihirap sa mamamayang Haitian.

Ang kadusta-dustang kalagayang ito ay ibinunga ng ilang dantaong pang-aalipin ng mga imperyalista sa bansang ito.

Mahigit isang siglong ginawang kolonya ng France ang Haiti. Nag-simula ito bilang pinakamayamang kolonya ng France sa kanlurang bahagi ng mundo. Nagmumula noon ang sangkapat ng kayamanan ng buong France sa sobra-sobrang tubo mula sa malalawak na plantasyon ng asukal, kape at iba pang produkto na itinayo ng France at pinaunlad sa pamamagitan ng dugo at pawis ng mga aliping Itim. Humantong naman ito sa ibayong pagdurusa ng kolonya.

Ang labis na kalupitan ng mga French ay nagbunsod ng serye ng mga pag-aaklas ng mga alipin na humantong sa paglaya ng Haiti noong 1804 mula sa kolonyalismo ng France. Naitayo ang unang inde-

pendyenteng republika sa Latin America at unang republika ng mga Itim sa buong mundo.

Matagal nang hangad ng US na lahat ng bansa sa paligid nito ay mapailalim sa dominasyon nito. Prinoblema ng US ang patuloy pa ring malakas na impluwensya ng France sa Haiti, ang lumalakas na impluwensya ng iba pang kapangyarihan (pangunahin na ang Germany) at lumalaking pagkakautang ng Haiti sa mga bangko sa US. Kaya noong 1915, sa udyok ng mga bangko ng US ay sinamantala ng US ang kaguluhan sa Haiti nang mapatay ang presidente ng bansa, at sinalakay ng mga tropang Amerikano ang Haiti.


Binaklas ng US ang gubyerno rito at tuwirang ginawang kolonya ang bansa. Ang isa sa mga pinakaunang ginawa ng mga pwersang lumusob sa Haiti ay sakupin ang Haitian National Bank at kumpiskahin "para mailigtas" ang hawak nitong \$500,000 na agad-agad dinala sa US. Nagbalangkas din ang US ng bagong konstitusyong nagbibigay ng napakalaking pribilehiyo sa mga kolonyalista, kabilang na ang pagpapahintulot sa mga dayuhan na magmay-ari ng lupa.

Nagsimula ang neokolonyal na paghahari ng US noong 1934 nang umalis na ang mga tropang Amerikano at nagluklok ng papet na presidente.

Pinakamalupit at pinakagahaman sa mga naging papet na pinuno ng Haiti ang mag-amang Francois "Papa Doc" at Jean-Claude "Baby Doc" Duvalier na magkasunod na namuno bilang mga diktador mula 1957 hanggang 1986. Binuhusan ng US ng malaking ayudang militar ang diktadura ng mga Duvalier kapalit ng mga konsesyong pang-ekonomya. Naging ganap na palaasa sa ayuda mula sa US di na lamang ang militar kundi ang ekonomya ng papet na estado sa Haiti.

Ginawang tambakan ng sobrang produktong pang-agrikultura ng US ang bansa. Inilaan ang kumitid na agrikultura ng Haiti sa mga pananim na pang-eksport para sa US. Pagsapit ng dekada 1980, sistematiko nang nawasak ng imperyalismong US ang agrikultura para sa sariling konsumo ng Haiti sa pamamagitan ng malawakang pagtatambak dito ng mga sobrang produktong pagkain mula sa US.

Bunga nito, daanlibong magsasakang Haitian ang nawalan ng mapagkakakitaan at nagsidagsaan sa kalunsuran. Nagsilbi silang balon ng murang paggawa para sa





mga malamanupaktura ng mga dayuhang korporasyon.

Noong 1990, nahalal na presidente ng Haiti si Jean-Bertrand Aristide, isang dating pari. Nagpatupad si Aristide ng ilang reporma sa layuning makapagtatag ng nakatatayo-sa-sariling ekonomya. Ang pagkapanalo ng popular na anti-imperyalistang presidente ay nagbunsod ng malawak na kilusang masang naghahangad ng pagbabago sa Haiti. Sa galit dito ng imperyalismong US, siyam na buwan matapos manungkulan si Aristide ay nagpakulo ito ng kudeta na nagresulta sa pagpapalayas sa kanya mula sa bansa. Nagbunsod ito ng tatlong taong kaguluhan sa Haiti na natigil lamang nang mapilitan ang US na hayaang makabalik si Aristide sa kapangyarihan.

Muling nanalo bilang presidente si Aristide noong 2000. Nagpakana naman ng bagong mga taktika ang US para mapahina ang kanyang pamumuno. Pinutol ng US ang lahat ng ayuda sa Haiti upang makapagbunsod ng malawakang diskuntento sa bansa. Dahil 30-40% ng badyet ng Haiti ay pino-pondohan ng ayudang panlabas, kalakhan mula sa US, ang paghintong ayuda ay nagbunga ng pagtigil o ibayong pagkabulok ng mga serbisyong panlipunan at mga imprastraktura. Isa na namang kudetang tuwirang inilunsad ng US ang muling nagpatalsik kay Aristide noong 2004. Dinukot siya ng mga tropa ng US mula sa palasyo ng presidente at sapilitan siyang dinistyero sa South Africa.

Ang muling pagpapatalsik sa popular na anti-imperyalistang presidente ay nagbunsod ng malawakan na namang kaguluhan. Mula noon, sa pagtutulak ng US ay pormal na ipinailalim na ang Haiti sa awtoridad ng United Nations, ha-

bang patuloy na nagmamantine ang US ng papet na pamumuno at sariling presensyang militar sa bansa.


Bunga ng ilang dantaon nang panghuhuthot ng mga kolonyalista at imperyalista sa mga rekursong ng Haiti at pagtatambak dito ng kanilang mga sobrang produkto, naging pinakamahirap na bansa na ito sa kanlurang bahagi ng mundo, at isa sa pinakamahihirap sa buong mundo.

Bago pa man ang lindol, 80%) na ng populasyon ang naghihikahos. Karamihan ng mga Haitian ay kumikita lamang ng wala pang \$1.00 (katumbas ng ₱45) bawat araw. Kalahati ng populasyon ay hindi marunong magbasa at sumulat.

Halos kalahati ng bilang ng mga namamatay ay pumapanaw nang dahil lamang sa mga sakit na napakadali sanang iwasan o gamutin. Siyamnapung porsyento (90%) ng mga bata ay may mga sakit na sanhi ng pag-inom ng maruming tubig at pagkakaroon ng mga bulate. Sampung ulit na mas mataas ang bilang ng mga taong may tuberkulosis kumpara sa ibang bansa sa Latin America.

Ang gayong kalunus-lunos na kahirapan at kabulukan ng panlipunang serbisyo at imprastruktura ang dumidiskaril sa pagbangon nito sa sarili at anumang pagsisikap na maayudahan nito ang mga biktima ng lindol. Kulang na kulang ang mga ospital, ambulansya, trak ng bumbero at kagamitang panakulo ng bangkrap na papet na guberno. Hindi makadaong ang malalaking barkong may dala ng mga

ayudang pagkain at gamot dahil talong winasak ng lindol ang dati nang bulok na daungan. Hindi rin makalapag ang mga eroplanong may dalang mga suplay para sa mga nasalanta dahil bulok at atrasado ang pagkakayari ng pangunahing paliparan sa kapitolyong Port-au-Prince.



Humahantong na ang desperasyon at galit ng mamamayang Haitian sa pagsiklab ng malawak na kaguluhan sa Port-au-Prince at mga paligid na lugar. Ang nagkakat na mga bangkay ay pinagpapatungpatong sa mga lansangan para magsilbing barikada.

Inuunahan na ng US ang posibilidad ng malawak na kaguluhan kaya agad na itong nagpadala ng panimulang 10,000 tropang militar para muling kontrolin ang bansa nang tuwiran.

Napakahalagang makabangon sa sarili at makalaban ang mamamayan ng Haiti upang makaalpas sa mabigat na pambansang dominasyon, pagsasamantala at pang-aapi sa kanila ng US, at nang sila'y makatayo sa sarili at makasulong sa landas ng sariling pag-unlad.

Sa proseso ng kanilang pagbangon at paglaban, dapat panagutin ng mamamayang Haitian ang mga imperyalistang kapangyarihan, pangunahin na ang US, at ang mga punong papet nila sa kanilang kriminal na responsibilidad sa patungpatong na kahirapan at pagdurusang dinaranas ngayon ng mamamayang Haitian. **AB**

Mga sibilyang kaswalti sa Afghanistan, dumarami



Patuloy na lumalaki ang bilang ng mga sibilyang napapatay sa Afghanistan sa siyam na taon nang gerang agresyon ng mga pwersang kabilang sa North Atlantic Treaty Organization (NATO) na pinamumunuan ng US.

Umabot sa 2,412 sibilyan ang napatay noong 2009, pinakamarami sa siyam na taon nang gera, ayon sa datos ng United Nations Mission in Afghanistan (Unama).

Mga bata ang karamihan sa mga biktima. May kabuuang 1,050 bata na may gulang na di tataas sa 18 taon ang napatay noong 2009. Tatlong bata ang namamatay bawat araw, ayon naman sa Afghanistan Human Rights Watch.

Karamihan ay napatay sa mga pambobomba ng mga eroplano ng mga mananakop sa mga sibilyang komunidad.

Maramihan at pwersahang nirekluta rin ng mga tropa ng US ang mga bata para maging mga sunda-

lo. Dagdag dito, ang mga bata ay pinagsasamantalang sekswal, pinagkakaitan ng kinakailangang edukasyon at kalusugan at iligal na ikinukulong.

Inaasahang lalaki pa ang mga kaswalting sibilyan sa taong ito dahil magdadagdag pa ng 37,000 tropa ang US at NATO nitong 2010. Target nitong magpakat ng kabuuang 150,000 tropa sa Afghanistan. Kaugnay nito, iniutos ni US Pres. Barack Obama ang pagdaragdag ng \$33 bilyon para tustusan ang gera sa Afghanistan at Iraq sa taong ito. Bukod pa ito sa hinihiling ni Obama sa Kongreso ng US na \$708 bilyong badyet para sa Department of Defense sa 2011.

Gloria Arroyo, may bagong kaso ng pandarambong

SINAMPAHAN noong Enero 6 ng kasong *plunder, graft* at administratibo sina Gloria Arroyo at Sec. Arthur Yap ng Department of Agriculture (DA). Ang kaso ay may kinalaman sa pagbili ng National Agri-Business Corp. (NABCOR) ng DA noong Setyembre ng 98 makinang panggawa ng yelo na nagkakahalaga ng P455.7 milyon.

Pinangunahan nina Rep. Rafael Mariano at Joel Maglunsod ng partidong Anakpawis ang pagsasampa ng kaso. Kabilang din sa mga nagreklamo sina Cherry Clemente (pangkalahatang kalihim ng Anakpawis), Fernando Hicap at Salvador France (pambansang tagapangulo at pangalawang tagapangulo ng Pambansang Lakas ng mga Mamamalakaya ng Pilipinas o PAMALAKAYA.)

Ayon sa kanila, hinayaan ng mga akusado ang pagtutuloy sa kontrata sa kabila ng iregularidad

sa *bidding* na pumabor sa Integrated Refrigeration System and Services Inc. (IRSSI). Binili ang bawat makina sa halagang P4.65 milyon kung saan P2.3 milyon ang patong sa bawat isa. Sa kabuuan, umabot sa P225.4 milyon ang patong sa mga makina.

Kaduda-duda rin na nabuo lamang bilang korporasyon ang IRSSI isang araw bago gawin ang maanomalyang *bidding*.

Kabilang din sa mga sinampahan ng kaso ang mga upisyal ng NABCOR at IRSSI.

Paniningil ng RFID, pinahinto ng Korte Suprema

INIUTOS noong Enero 12 ng Korte Suprema ang paghinto sa paniningil ng Land Transportation Office (LTO) ng P350 sa lahat ng mga nagrerehistro ng kanilang mga sasakyan para sa Radio Frequency Identification Device (RFID), bukod pa sa P169 na singil sa pagpoproseso nito sa kompyuter. Ang RFID ay mekanismo para matukoy ang datos sa rehistro ng mga sasakyan.

Kinatigan ng Korte Suprema ang petisyon na isinampa ng Pinagkaisang Samahan ng mga Tsuper at Opereytor Nationwide (PISTON) at mga progresibong partido na pansamantalang itigil ang pangungulekta para sa RFID.

Ayon sa Korte Suprema, walang *public bidding* na naganap para sa nasabing proyekto at dagdag bayarin lamang ito sa mga motorista. Iniutos din nito sa LTO na siyang may pakana ng nasabing proyekto na isauli ang ibinayad ng mga nagbayad na. Ayon sa PISTON, dapat ibalik kaagad sa mga motorista ang ibinayad na P519.00 para sa RFID. Anito, kung mabilis maningil ang LTO sa RFID ay dapat mabilis din sila sa pagsauli ng iligal nilang sinisingil sa mga motorista. Hiniling din nila sa Korte Suprema na tuluyan nang ihinto at ibasura ang RFID. Sa kabuuan ay nakakulekta na ang LTO ng P46.7 milyon mula sa proyektong ito.

Binabalak namang kasuhan ni Bayan Muna Rep. Satur Ocampo ang LTO at hepe nito na si Arturo Lomibao dahil sa iligal na paniningil para sa nasabing proyekto.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 2
Enero 21, 2010
www.philippinerevolution.net

Editorial

Sigaw ng masang magsasaka: Lupa at katarungan!

Mula sa iba't ibang sulok ng bansa, binabagtas ngayon ng mga magsasaka ang mga lansangan tungo sa punong lunsod upang padagundugin ang kanilang sigaw para sa lupa at katarungan. Kasabay ng paggunita sa ika-23 taon ng Masaker sa Mendiola sa Enero 22, ipinamamalas ng mga magsasaka ang kanilang determinasyon na labanan ang anti-magsasakang estado at ibayong isulong ang pakikibaka para wakasan ang mapang-api at mapagsamantalang naghaharing sistema.

Animo'y nag-aalburutong bulkan ang naipong galit sa dibdib ng milyon-milyong magsasakang mahigit dantaon nang dinadagangan ng isang lubhang atrasado, mapagsamantala at mapang-aping sistema. Nitong nagdaang siyam na taon sa ilalim ng rehimeng US-Arroyo, lalo silang nasadlak sa kaapihan, kahirapan at kagutuman. Pinag-ibayo ang pangangamkam ng lupa ng malalaking luma at bagong panginoong maylupa, mga makadayuhang agribisnes, ispekulador sa *real estate*, kumpanya sa pagmimina at iba pa. Pinaghahari ang pasismo at terorismo ng estado sa kanayunan.

Matapos ang mahigit 20 taon, ganap nang nahubaran ang huwad na Comprehensive Agrarian Reform Program (CARP). Hindi lamang ito bigo na buwagin ang malalawak na lupain ng malalaking panginoong maylupa, binigyang-daan pa nito ang malawakang pangangamkam ng lupa at konsentrasyon nito sa kamay ng mga bagong panginoong maylupa at malalaking agrokorporasyon.

Kung kaya walang saysay ang paulit-ulit lamang na pagpapalawig ng CARP. Sa ilalim ng rehimeng Arroyo, ang CARP at mga programang umano'y pansuporta sa masang magsasaka ay nagsisilbi lamang na palabigasan ni Arroyo at mga kasabwat niya sa burukratikong korapsyon. Mula sa Fertilizer Fund Scam, Agriculture & Fisheries Modernization Fund Scam, hanggang sa Swine Scam, bilyun-bilyong piso ang ibinubulsa nina Arroyo at kanyang mga upisyal gamit ang pondong laan sa mga serbisyong agrikultural.

Alinsunod sa imperyalistang patakarang globalisasyon ng "malayang pamilihan," inengganyo ng CARP ang pagpapalit-tanim at pagpapalit-gamit ng



**Mga tampok
sa isyung ito...**

**Mga pribadong hukbo,
di totoong babaklasin
ni GMA**
PAHINA 4

**Pagpupugay kina
Kimay at Nai**
PAHINA 7

**Armadong rebolusyon
sa India**
PAHINA 8

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com